

30 NOV 1999

Mahathir-Majoriti

KEMENANGAN BUKTI BN MASIH POPULAR, KATA MAHATHIR

KUALA LUMPUR, 30 Nov (Bernama) -- Perdana Menteri Datuk Seri Dr Mahathir Mohamad berkata kemenangan Barisan Nasional (BN) dengan majoriti lebih dua per tiga pada pilihan raya umum ke-10 membuktikan yang populariti BN masih tinggi.

"BN berjaya memenangi 149 kerusi parlimen, iaitu satu jumlah yang melebihi jumlah kerusi parlimen yang dimenangi pada pilihan raya umum 1995, sebanyak 132 kerusi," kata beliau pada persidangan berita di Pusat Dagangan Dunia Putra (PWTC) sebaik sahaja BN diumumkan memperolehi lebih daripada dua per tiga daripada jumlah kerusi di Dewan Rakyat.

Katanya walaupun angka 149 kerusi parlimen itu tidak rasmi, ia merupakan satu kemenangan yang besar.

Dr Mahathir, yang juga Pengerusi BN dan Presiden Umno, memulakan persidangan berita itu dengan berkata: "Saya dengan penuh kesyukuran dan gembiranya mengistiharkan bahawa BN telah mendapat kemenangan majoriti lebih daripada dua pertiga."

Pengumuman beliau itu disambut dengan sorakan "Hidup Mahathir" dan "Hidup BN" oleh lebih 200 orang tetamu BN yang dijemput untuk mengikuti perkembangan keputusan pilihan raya umum.

Ketika Dr Mahathir membuat pengumuman itu pada pukul 3 pagi ini, BN secara rasmi telah memenangi 131 kerusi Parlimen.

Katanya, pada pilihan raya umum yang lalu, walaupun BN memenangi 132 kerusi Parlimen tetapi angka itu telah bertambah kepada 162 kerusi berikutan penyertaan anggota Parlimen dari Parti Melayu Semangat 46 ekoran pembubarannya.

"Jelas bahawa bagi pilihan raya umum pada tahun 1999 ini BN telah membuktikan bahawa popularitinya masih tinggi iaitu mendapat 149 kerusi Parlimen," kata beliau.

Dr Mahathir berkata BN juga telah berjaya menawan semula semua negeri kecuali Terengganu dan Kelantan pada pilihan raya umum ini.

"Yang lain (negeri-negeri yang ditawan semula oleh BN), kita dapat kemenangan majoriti lebih daripada dua pertiga," kata beliau.

Perdana Menteri juga berkata buat pertama kalinya, pilihan raya umum menyaksikan kekalahan "jaguh-jaguh parti lawan" iaitu Setiausaha Agung DAP Lim Kit Siang dan Timbalan Pengerusi DAP Karpal Singh di Pulau Pinang.

Lim kalah kepada calon BN Chia Kwang Chye untuk kerusi Parlimen Bukit Bendera manakala Karpal gagal mempertahankan kerusi Parlimen Jelutong selepas kalah kepada muka baru daripada parti Gerakan, Lee Kah Choon.

Ketika ditanya mengapa Lim dan Karpal kalah, Dr Mahathir berkata beliau percaya mereka tidak dapat membuktikan "kegunaan" mereka sebagai anggota Parlimen.

"Perbahasan mereka di Dewan (Rakyat) tidak berguna. Saya rasa sebab inilah mereka ditolak," kata Dr Mahathir.

Ditanya mengenai kekalahan banyak tokoh Umno pada pilihan raya umum ini, Dr Mahathir berkata: "Demikian juga dalam parti-parti lawan. Kita tak hilang jaguh-jaguh kita."

"Saya menang," kata beliau, diikuti dengan sorakan oleh para hadirin.

Dr Mahathir berkata Kabinet baru akan dibentuk selepas "dikaji senarai rasmi mengenai siapa yang menang."

Empat orang Menteri Kabinet gagal memenangi kerusi Parlimen pada pilihan raya umum ini.

Mereka ialah Menteri Perdagangan Dalam Negeri dan Hal Ehwal Pengguna

Datuk Seri Megat Junid Megat Ayub, Menteri Kewangan Kedua Datuk Mustapa Mohamed, Menteri di Jabatan Perdana Menteri Datuk Abdul Hamid Othman dan Menteri Pembanguna Luar Bandar Datuk Annuar Musa.

Dr Mahathir juga berkata BN akan menubuhkan kerajaan di negeri-negeri yang dimenangnya "secepat mungkin".

Mengenai kemenangan Presiden Parti Keadilan Nasional Datin Seri Dr Wan Azizah Wan Ismail di Parlimen Permatang Pauh, Dr Mahathir berkata beliau percaya ia kerana simpati orang ramai terhadap Wan Azizah.

Wan Azizah adalah isteri bekas timbalan perdana menteri Datuk Seri Anwar Ibrahim, yang mewakili kawasan itu sebelum ini.

"Saya rasa banyak orang akan bersimpati apabila melihat seseorang pergi dengan anaknya dan menangis (pada perjumpaan politik). Saya boleh faham perasaan orang ramai. Saya rasa orang ramai wajar berperasaan begitu.

"Tetapi persoalannya ialah sama ada beliau dapat memberi sumbangan.

Ketika ditanya mengenai peranan PAS yang dijangka menjadi ketua pembangkang dalam Dewan Rakyat, Dr Mahathir berkata: "Tak ada apa. Cuma maki hamun."

Kepada satu soalan, Dr Mahathir mengakui bahawa majoriti perngundi Cina memberi sokongan mereka kepada BN

"Saya rasa orang Cina menghargai apa yang dilakukan oleh kerajaan terhadap mereka terutama bagi mengatasi krisis kewangan. Orang Melayu luar bandar tidak merasai kesan masalah kewangan itu.

Pada persidangan berita itu yang turut dihadiri oleh wartawan asing, seorang penyokong BN meminta Dr Mahathir supaya menasihatkan media asing "berhenti menulis perkara-perkara yang buruk mengenai Malaysia."

Sambil tersenyum, Dr Mahathir berkata: "Adalah menjadi kebebasan akhbar sama ada hendak bercakap bohong atau tidak."

-- BERNAMA

ES NMO